

# DR JUNG STAINLEMER



## In dären Ussgoob:

Begriessig	2
Tattoo-Hälfer-Ussflug	3
Glygge-Grümpeli	4
Basel Tattoo 2008	7
Die Neue	9
Rätselegge	11
Ussbligg	12



## Begriessig:

Sali zämmel!

Lang isch es här syt dr letschten Ussgob vom Junge Stainlemer aber jetzt isch es ändlig wider eso wyt und mir mälden uns zruigg nach dr Summerpause. Mir hoffen ihr händ dr Summer gnosse, schöni Ferie verbrocht und e guete Start ins Schuel- oder Bruefsläaben gha.

Wie immer isch öbbis passiert in däre Summerpause. Zum Bischpil het sich unseren FCB zum zweite Mol für d Champions League qualifiziert und praktisch vor unserer Huustüüre het d Europameischterschaft 2008 statt gfunde. Das isch aber nid s einzige was in Sache Fuessball passiert isch dä Summer. Au d Kicker vo de Junge Stainlemer sin dä Summer erfolgryych im Ysatz gstande. E Bricht über s Glyggegrümpeli 2008 findet ihr in dären Ussgoob.

Vili vo euch sin au das Johr wider bim Basel Tattoo als Hälfer im Ysatz gstande, e härzliggs Danggschön an däre Stell. Byyträg zum Tattoo findet ihr e paar Sytte witer hinde.

Usserdäm hämmer in dr letschten Ussgoob die neue Pfyffer vorgstellt. Wie in dr letschten Ussgoob versproche hämmer dasmol die neue Dambuure e bizzeli unter d Lupe gno.

So jetzt wär s Wichtigschten erwähnt und mir wünsche euch vil Spass bim Duureblättere vo dr neuschten Ussgoob vom Junge Stainlemer.

Dom & Niggi

## Tattoo 2007-Hälfer-Ussflug

Tattoo-Hälfer-Ussflug vo de Junge Stainlemer vom 24.Maie anno 2008

Liebi Stainlemer Jung und Alt,

Droffe hän mir iss am Bahnhof um 10 for Nüni in dr Schalterhalle vom Bahnhof SBB. Ab em Perron 8 sin mir den richtig Olte (mit Problem vom e ne Kontrolöör wäge de verschiedene Altersstuefe und Billiets) Bärn, umstiege in Bärn uff em Perron 13 in Zug wo Richtig Gemme, Krenzen, Ins. Dörte hänn mir ins Poschtauto miesse umstiege wo nach Erlach g'fahre isch. Denn sin mir zum Ässe, es gibt zwei Schnitzel parniert mit Pommes uss Ärdöpfel. Denn het dr Tschan angefangen mit Serviettenkugele, in Cola daucht, z'wärfe. Zum Raffi Vecci geworfen und den het är das Bölleli zuruckgeworfe. Denne sin mir Swin-Golf go spiele gange.

Dr schlächtichtschdi isch s' Heidi gsi. Mit insgesamt 259 Schläg hett äär verloore. Ahschliessend sin mir wieder nach Basel zurugg g'fahre.

E danggerscheen im Steffi Wintergee fir organisiere.

Das isch dr Bricht vom Heidi

## Glygge-Grümpeli



Au das Joor isch in dr Sandgruebe s Glygge-Grümpeli ageseit gsi und ganzi 5 Mannschafte hän vo uns Deil gno. Bi de Binggis sin das Auborg Stainheim und FC Auebärg Staine gsi, bi de Junge Carnevalsaray Stainlürümspor und Stainz 05 und dr Stamm het mit de Staine Old Stars au e Mannschaft gstellt.

Das Joor hets leider bi keiner Mannschaft welle sii, as mer e Titel hole oder zumindest ufs Podest könne.

Zwar hän sich Carnevalsaray Stainlürümspor und Stainz 05 als Gruppe-siiger beidi für d Zwischerundi qualifiziert doch für dr Halbfinal hets bi beidne knapp nid glänggt. Carnevalsaray Stainlürümspor het mit 2 Sieg und eiere Niederlag knapp dr bescht 2. verbasst und Stainz 05 het ei Sieg, ei Unentschiide und ei Niederlag gschafft und dorum ebefalls dr Iizuug in Halbfinal verbasst.



Au bi de Binggis hets nid welle länge unter die beschte 3 z ko, aber vom Spielerpotential här sotts neggscht Joor wieder öbbis z fiire gä. Klar sind d Erwartige das Joor vilicht wieder hoch agsetzt gsi nach de viile Erfolg in de letschte Joorre. Doch ohni Erwartige und Druck ka me kei Bluemetopf gwinne!

Do hän mer no baar Impresione vo däm Wuchenänd und hoffe, dass au neggscht Joor wieder so vyyl Jungi wärde mitmache, i meinti sogar, dass neggscht Joor mir dra sind mit organisiere und was gits schönere als s eigene Turnier z gwünne?



E suubers Iilaufe verhindert jeglichi Verletzung und drzue ghört au e konzentrierts Dehne, wie me do bi dr Mannschaft vom Raymond seht.



In Aktion macht d Verteidigung samt Goalie fascht e bessere Iidrug als unseri Nati (zumindescht bim Luxemburg-Match) aber d Prämie sin definitiv kleiner, no...

Und das wär s Ziel für die neggschte Joore, wenn mer dr Käller eso schmügge könnte ;)





## Was isch eigentlich a Tattoo?

Au das Jahr hän die Junge Stainlemer wider e Stand am Basel Tattoo betriibe und so für s Wohl vo de vile Bsuecher gsorgt. E Baar vo euch hän sich villicht gfrogt, wie das Tattoo entstanden isch und was hinter däm Name „Tattoo“ eigentlich steggt. Natürlich het s Basel Tattoo nüt mit däm Tattoo z due, wo sich dr Aint oder Ander in Arm oder in sunscht irgend e Körperteil stäche losst. S militärische Tattoo het sy Ursprung vil mehr im Änglische. Und zwor stammt s Wort vom Begriff „tap toe“ (ussgsproche: täb tou), was (frey übersetzt) eso vil heisst wie „dr Zapfhähne zuedreihe“.

Im 18. Jahrhundert sin nämlich änglische Militärdrummler am halb 10i zoobe dur d Strosse zooge zum de Soldate wo im Ussgang gsi sin s Signal z gäh, zrug in d Kasärne z go.

Glychzytig isch das Drummle au en Ufforderig an d Beizer gsi d Zapfhähne zue z dreihe ass d Soldate nid witergsoffe hän. Uss däm „tap toe“ isch denn mit dr Zyt dr Begriff „tattoo“ worde.



Glychzytig het sich das Drummle immer mehr zuen ere Show entwickelt wo scho frieh mit Fluetliecht unterstützt worden isch.

Im spohte 19. Jahrhundert denn het s Militär in verschiidene Städt agfange e Summerunterhaltigsprogramm für d Stadtbewohner z verastalte. Uss däne Shows sin denn die hüttige Tattoos entstande. S bekanntische Tattoo was hütte git isch das z Edinburgh in Schottland wo 1950 s erschte Mol stattgfunde het.

Syt 2006 gits jetzt au in Basel e sone „Military Tattoo“. D Zueschauerzahle stygge in jedem Jahr und 2008 het s Basel Tattoo immerhin 74'000 Bsuecher aagloggt.



## Härzligg Willkomme in dr Staine!

In dr letschte Ussgoob hän mer jo die neue Pfyffer bi de Binggis willkomme ghaisse und jetzt hän d Tamboure dr Blatz verdient. Mer wänn unseri Neue dodrmit allne bekannt mache und hän se kli befrogt zum Staineläbe und zur Fasnacht.

Erfreulicherwyys sinds ebe 11 Stügg wo dr Kurs vom Raymond Vetter und als Stellverdrättig vom Roman Meier bsueche und d Zuekunft vo unserne Tamboure bilde.

Das sind namentlig:

Name	Vorname
Dagorov-Grobben	Jan
Drubay	Nicol
Fünfschilling	Martin
Fünfschilling	Christian
Huber	Joshua
Jaeggi	Josua
Kaeslin	Nevin
Kamber	Luca
Metzger	Jasen
Niedermann	Maurice
Dubi	Micah Jason

**Froog 1: Wie hän der die erschte Staine-Mönet erläbt?**

- s gfallt uns, d Stunde mache Spass, sisich luschtig
- S Telifon-Spiel isch luschtig (eine duet öbbis vordrummle und s goht denn dr Reihe noch witer...)
- S Instruggder-Spiel isch guet (eine duet vordrummle und seht wie das isch wenn me Instruggder isch)

**Froog 2: Wie sehts mit em Iebe us?**

- Ich ieb 4 mol pro Wuche während 15 Minute
- Ich nur 3 mol während 15 Minute
- Ich ieb 7 mol!!
- Me merggt scho kli e Fortschritt in dene wenige Mönet

**Froog 3: Mache d Instruggder ihri Arbet guet?**

- si mache das guet, s sött meh Pause gä
- Und s Cola in dr Pause sött gratis si
- S neue FCB-Staine -Shirt isch z tüür
- Aber d Struktur vo dr Stund isch guet so wies jetzt isch

**Froog 4: Freueter euch uf d Fasnacht?**

- jo s goht jo nüm lang, d Vorfreud isch scho z gspüüre

**Merci zämme und iebet no flissig**

## Rätselegge

Findsch die 5 Fähler im untere Bild:



## Lösig vom Rätsel:

1. eins vo de Auge uf'em T-shirt 2. s Piccolo in dr Hand 3. d Trummeldeko  
4. die 2. Hnad vo eim hinde 5. s Halskettell unde rächts

## Ussbligg:

So das wär au scho wieder s Änd vo däre Ussgoob und mer hoffe iir händ wieder Spass ka am läse und rätsle. Jetzt kunnt also langsam die intensiv Iebzyt wos in Richtig Fasnacht goot.

Mir bedangge uns no nochträglich für dr Tattoo-Hälfer-Ussfluugs-Bricht us dr Familie Sauter.

Und au mir wärde in däre Zyt näbscht em Pfyffe kli öbbis z due ha, denn wenn d Verhandlige suuber laufe könnnts e Überraschig gä und zwar bereits im neggschte Stainlemer. Aso könnet euch freue.

In neggschter Zyt gilts sicher dr Herbstbummel z erwäne und denn kunnt au scho d Fasnachtssitzig wo der scho jetzt gspannt könnet si, als was iir das Joor durch d Gasse laufe wärded.

Mir verblyybe mit hoffetlig sunnige Herbstgriess und bis neggscht mol oder ebe im Käller.

Dom&Niggi

PS: No e Danggschön an all die wo am Basel Tattoo 2008 wieder sin go hälfe

